

# La confederaziun promova la cultura

■ (anr/ld) Per l'emprima giada ha il cussegl federal formulà la strategia e tschentà ils accents per la cultura per ils onns 2012–2015. La confederaziun vul promover la cultura durant questa perioda cun 637,9 milliuns francs. *Theo Maissen*, il pledader da la cumissiun, ha fatg attent che la cultura saja en emprima lingia l'incumbensa da las vischnancas e dals chantuns. En vista a la gronda muntada da la cultura per mantegnair e promover la diversidad culturala da la Svizra prevesa la lescha er ina contribuziun finanziaria da la confederaziun. Concret vul la promoziun da la cultura activar il barat cultural tranter las gruppas linguistics e levgiar als uffants e giuvenils l'access a las activitads culturalas. Las activitads culturalas da muntada naziunala promovan principalmain Pro Helvetia, la Biblioteca naziunala, il Museum naziunal e l'Uffizi federal da cultura.

La promoziun da la cultura saja er en l'interess dal turissem, ha fatg attent Maissen.

## Gronda muntada economica

Tenor in studi da l'onn 2005 èn occupadas var 200 000 personas cumplaina-

main u parzialmain en il sectur da la cultura. Quai munta ina contribuziun al product naziunal brut da 4,5%. L'onn 2007 ha il maun public mess a disposiziun da las activitads culturalas la summa da 2,24 milliardas francs. La confederaziun ha contribuì la summa da 334 milliuns francs. Quai vul dir ina cumpart da 15% u 0,4% dal preventiv da la confederaziun.

Il minister per la cultura, *Didier Burkhalter*, ha fatg attent als divers aspects areguard la coesiun naziunala ed accentuà l'impurtanza d'implantar activitads culturalas localas/regionalas che sajan er adattadas per promover l'economia.

La cumissiun propona d'augmentar la summa per 50,6 milliuns francs, numadamain 20 milliuns en favur da la protecziun da la patria e da la tgira da monuments, 10 milliuns per promover il film, 8,6 milliuns per Pro Helvetia e 12 milliuns per l'uffizi da cultura. Il cussegl dals chantuns ha approvà la lescha ed augmentà la summa per la protecziun da la patria e per la tgira da monuments per 20 milliuns francs e la contribuziun per la promoziun dal film per 10 milliuns francs.